

# Lebih 100 sertai Program Outreach CCA-SUEC

4B 14/11/2011 A13

**MEMBAKUT:** Lebih 100 orang terdiri pelajar, ibu bapa dan guru sekitar Kampung Bambangan dan Sinoko menyertai Program Outreach ‘Scaling Up Education In Community’ anjuran Persatuan Warga Prihatin (CCA-SUEC) Sabah, di sini, baru-baru ini.

Program bertema ‘Outreach Bambangan-Sinoko 2011’ itu dilaksanakan oleh seramai 30 ahli persatuan dengan kerjasama Biro Tata Negara (BTN), yang mensasarkan penyertaan pelajar sekolah, siswa dan siswi universiti, guru serta masyarakat setempat.

Pengerusinya, Dr Khalid Johari berkata program kali ini merupakan program yang kelima diadakan oleh persatuan sepanjang tahun ini membabitkan lebih 1,000 anggota masyarakat di seluruh tempat yang dijadikan pusat aktiviti di negeri ini.

Katanya, objektif utama program itu dilaksanakan ialah membantu masyarakat meningkatkan motivasi dan juga keyakinan diri, khususnya kepentingan pendidikan dalam keluarga.

“Sasaran utamakitaialah golongan pelajar di kawasan pedalaman



DR KHALID



KHASBULAH

yang serba-serbi kekurangan sumber ilmu pengetahuan dari luar agar mempunyai motivasi diri begitu juga masyarakat setempat untuk turut sama mengutamakan pendidikan anak-anak, sebagai agen perubahan masa depan,” katanya.

Ini, tambahnya, selaras dengan pelaksana program yang sebahagian besarnya dikelolakan oleh mahasiswa dan siswi termasuk para guru dari seluruh daerah

yang menjadi ahli persatuan. Berdasarkan latar belakang itu, persatuan yakin akan memberi impak yang berkesan dalam membimbing masyarakat mencintai bidang pendidikan, sebagai bekalan masa depan yang berharga.

Khalid berkata, kerjasama baik agensi kerajaan dan swasta dalam menjayakan program kemasyarakatan itu membolehkan persatuan terus menabur bakti di seluruh pelosok negeri ini untuk



ALBUM ... Sebahagian pemimpin masyarakat, ahli SUEC yang menyertai program berkenaan.

menunaikan matlamat murni berbakti kepada masyarakat, seterusnya membantu kerajaan menaiktaraf hidup melalui pembangunan pendidikan.

Sementara itu, Pengarah Program, Mohd Saperi Matnin berkata sambutan yang amat memberangsangkan daripada masyarakat di semua lokasi program di negeri ini membantu menjayakan pelbagai pengisian aktiviti.

Katanya, antara aktiviti yang menjadi rutin program ialah seminar keibubapaan, ceramah motivasi pelajar, rekreasi minda, pendidikan jasmani, kebudayaan dan bakat serta gotong-royong perdana bersama masyarakat.

Program kali ini menyaksikan penyertaan ramai ibubapa, pelajar dan guru dari Sekolah Kebangsaan (SK) Bambangan dan SK Sinoko.

“Kerjasama baik masyarakat setempat dan guru yang sanggup

TURUT SERTA ... Sebahagian warga pendidik, mahasiswa dan siswi UMS yang turut serta dalam program itu.

berkampung di kawasan sekolah untuk sama-sama menjayakan pelaksanaan program amat dihargai oleh pihak pengajur,” katanya.

Selain aktiviti membabitkan pelajar, masyarakat juga berpeluang menyertai ceramah ‘Pendidikan Keluarga’ oleh Khalid yang juga pensyarah sekolah pendidikan UMS. Ceramah 1Malaysia bertajuk ‘Negara Maju’ turut disampaikan oleh Kasbullah Mangun, mewakili BTN.

Saperi berkata, sepanjang tiga hari program, pelbagai aktiviti mengeratkan perpaduan ialah dengan mengadakan senaman pagi 1Malaysia, bersama masyarakat dan pengelola. Turut diadakan aktiviti berupa pendidikan dan rekreasi sukaneka 1Malaysia bagi merapatkan hubungan kekeluargaan masyarakat setempat dan pengajur.

Dalam pada itu, rata-rata peserta khususnya pelajar berpendapat program membantu meyakinkan setiap peserta akan kepentingan menguasai pendidikan hingga diperingkat tinggi.

Peserta Karmilah Liashin, 27,

berpendapat program adalah tanggungjawab sosial yang patut dipikul oleh semua pihak dalam usaha untuk membantu masyarakat di kawasan pedalaman.

“Program seperti ini adalah salah satu platform yang mudah untuk mendekati masyarakat luar dan secara tidak langsung mampu menerapkan modal insan di dalam diri semua mahasiswa/i yang terlibat,” katanya.

Manakala seorang penduduk, Mohammad Ancaloii, 50, yakin program seumpama itu amat penting bagi memberi gambaran kepada masyarakat perihal pentingnya pendidikan sebagai bekalan perubahan keluarga akan datang.

“Kita dapat berkongsi pengalaman dengan para peserta dan pengajur yang terdiri daripada pelajar pengajian tinggi dan juga penceramah yang berwibawa. Kita berharap program seumpama ini akan diteruskan pada masa akan datang,” tambahnya.

Majlis penutupan program telah disempurnakan oleh Kasbullah yang juga merupakan timbalan pengurus CCA-SUEC.

